

# Duas mustgas cun ina frida

Il chantun vul promover il turissem da sanadad ed uschia segirar la purschida medicinala decentrala

■ **(anr/ac) Il chantun Grischun vesa potenzial en il turissem da sanadad. Ina gruppia directiva timunada da Philipp Gunzinger ha instradà ils emprims pass cun sustegn dal Forum economic dal chantun Grischun. Il glindesdi passà è la strategia vegnida plementada en la clinica Gut a Fläsch.** Il chantun Grischun sa regorda a sias ragischs turisticas. Ils emprims visitaders d'ordvart han pli probabel visità ina da las funtaunas curativas sin intschess grischun. Tavau ed Arosa na fissan oz betg ils lieus turistics senza ils pazients da cura d'anruras. Sin quella tradiziun turistica vul il chantun sa fundar, sco quai ch'il cusseglier guvernativ e chau dal departament da giustia, segirezza e sanadad *Christian Rathgeb* ha explitgà il glindesdi passà a Fläsch en il stabiliment da la clinica Gut. El ha fatg attent al turissem da sanadad creschent sin l'entir mund ed a la veglia chantunala da sa posiziunar en quel segment. Ina giada per segirar la purschida medicinala decentrala dal chantun Grischun e da pussibilitar a quella branscha da regenerar dapli entradas. Da l'autra vart porscher a la gastronomia ed hotellaria novas pussaivladads dad augmentar las pernottaziuns. Il cusseglier guvernativ è persuadi da l'auta qualidà da la purschida da sanadad en il chantun s'organisada en divers centers da sanadad regionalis. El vesa per gronda part ina purschida da nischas en il sector da la sanadad turistica per pudair uli-

var las surcapacitads medicinalas e turisticas principalmain durant la tranterstagium.

## La gruppia directiva è gia activa

Per promover il turissem da sanadad ha il chantun installà ina gruppia directiva timunada da *Philipp Gunzinger*. El posseda enconuschientschas en domadus secturs entras sias activitads tar il Bogn Engiadina Scuol ed entaifer il Center da sanadad da l'Engiadina Bassa. Gunzinger ha punctuà la valor da la purschida da sanadad per l'economia regiunala e las numerusas plazzas da lavur existentas en quella branscha. La gruppia directiva installada l'entschatta da l'onn veglia definir la strategia e coordinar las iniziativas entaifer las diversas regiuns. Dasperas haja ella gia fatg empermententas experienzias cun in secretariat. Grondas sajan las dumondas stadas ed il basegns per infurmaziun en connex cun il turissem da sanadad. Dumondas colliadas cun l'interess da s'engaschar sin quel sector. Gunzinger ha accentuà la veglia da la gruppia directiva dad installar il secretariat a moda durabla. El ha medemamain discurrì da ina purschida da nischas ed ha fatg attent a la dumonda per servetschs da sanadad en connex cun ina dimora turistica da persunas che garegian tgira preventiva u che sa decidan per tgira e tractament en il chantun Grischun suenter ina diagnosa u la cumbinaziun da tgira e far vacanzas en la vegliadetgna. Ma

Gunzinger ha era cleramain fatg attent ch'il turissem da sanadad sulet na possa betg ulivar tuttas sperditas dal turissem muntagnard dals onns passads.

## Support nà dal Forum economic

Preschent a l'infurmaziun davart il turissem da sanadad è stà il president dal Forum economic Grischun *Alois Vinzens*. El ha annunzià in studi finanzià dal Forum che veglia porscher a la gruppia directiva las infurmaziuns necessarias. Dal tuttatafeg nunenconuschenta na saja la tematica betg al Forum economic, ha fatg a savair Vinzens. El ha menziunà ina retschertga da l'onn 2013 che saja vegnida a la conclusiun ch'il chantun possedia in tschert potenzial per ina purschida en il turissem da sanadad. Là hajan ins defini tranter 500 e 1200 plazzas da lavur novas pussaivlas da crear cun turissem da sanadad. El ha fatg attent ch'il segment da sanadad saja gia creschì fermamain en il chantun Grischun ed i saja da beneventar sche la purschida existenta possa vegnir nizzegiada e schlargiada efficientamain. La finfinala er a favur da la populaziun indigena. Gunzinger vesa la pussaivladad da collavurar cun instituziuns medicinalas grondas da la Bassa per coordinar la purschida. E Rathgeb beneventa bain ina tscherta concorrenza tar ils purschiders, per concurrenzar sin aut nivel manchia la grondezza necessaria al chantun Grischun.



Sa fatschentan cun dumondas dal turissem da sanadad: Christian Rathgeb ed Alois Vinzens (da dretga).